

日本
撰述

本朝高僧傳

十六十七
十八

聖然	良範	真禪	信堅	嚴家	信日	賴瑜	顯意	実勝	良敏	良胤
道光	賴申	照源	三繼	賴象	良殿	尊海	親玄	空月	凝然	聖雲
栄海	聖忠	證賢	禪爾		道玄	澄海	唯空	道蒼	実融	良曉
澄田	果宝	慈遍	正為	慈妙	照玄	盛譽	俊才	寛性	宥範	湛睿
宥快	貞舜	豪尊	道瑜	玄性	賴譽	存海	聖憲	総融	靈波	照慧
快尊	真阿	志玉	宥信	隆堯	成雄	聖聰		長譽	聖岡	長覺
					亮典	実海	印融	仟遍	祐崇	真盛

内閣文庫	
番號	和 29478
冊數	32 (9)
函號	192 480

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM. Kodak



教部
文庫

本朝高僧傳卷第十六

内一〇一〇一號

淨慧二之十三

濃州盛德沙門 師蠻 撰

京兆觀勝寺沙門良胤傳

釋良胤號大圓光祿大夫源賴政之裔丹州三重鄉人也建曆二年十二月生十歲投國府大谷寺閑觀

從驅烏列十六薙染天賦慈忍精修肅嚴冠歲思惟

佛法幽玄不逢明師爭成菩提嘉禎二年策錫上京

詣清水寺懇祈冥助衛兵曹盛景見之問故胤語素

盛景感曰為公擇師實賢僧正勝賢的承擅其瀉

佛部
圖書

本朝高僧傳卷之十六

瓶外之何往胤謁賢公于北白河峯殿藤道家別墅也三寶
金剛兩流傾底密付文永五年盛景延以洛東觀勝
寺此寺行基之開地而園城寺行圓僧正領之連年
荒廢艸結數椽敷衍宗義燒松葉煮菜根食糞清節
自宴如也五條若官別當實深僧正當歸依胤臨其
溘焉青銅三千緡送備冥福衆曰買田寄寺不爾繼
富家藏以其贏可修息薦也胤曰追忘不依長短誠
心爲善菩薩六度之行以檀波羅蜜爲第一也我欲
供養法界便求定朝所作彌陀觀音勢至像安于寺
餘賙貧窮或與乞丐一錢不畱一夜賊來室無餘長

與佛供米慰諭遣之恐人殺賊胤自送門一時隣舍
僮兒被酒打狗寺僧呵叱之僮止搏狗擊房戶房戶
皆壞諸徒啟胤曰此僮在矣乞官治之今若恕宥後
不可測也胤曰諸徒從我學佛愧我訓之不足也且
佛法以平等待有情一切衆生自性清淨飲無明酒
惹煩惱魔狂醉辭謔昏迷不度我輩逢此宜發哀調
訓彼暴如何卻益嗔恚將非自醉耶豈不聞我門以
六度之將攻六弊之賊施將攻慳賊禪將攻散賊忍
將攻恚賊進將攻懈賊戒將攻犯賊智將攻癡賊汝
等任慈忍之將則嗔怨之賊不擊而自潰耳豈假世

之官法乎諸徒愧服異日僮主謁謝曰嚮頑僮狂醉
撓亂清衆乞聽指揮嚴加譴罰胤笑曰穉兒戲劇蓋
常事耳我徒呵之添我不德於兒何責焉其主以胤
爲長者益加敬洛邑有狂女神異難測咒僧加持女
笑曰我亦知之罵詈日嘲授之祕符唾擲蹂躪傷人
叱之女曰惡名利僧不嫌佛法與胤祕符畏伏拜禮
焉弘安四年秋八幡神祠降伏蒙古胤亦預敕重奉
敕自刻五大尊像安于觀勝歷於元戎龜山上皇及
離宮問宗乘正應三年上皇落飾受胤密灌法與胤
入山胤嫌受皇恩或匿石山巖窟或遁高野山翌歲

五月二十六日寂于觀勝壽齡八十一法臘六十六
著壺囊鈔十卷今行於世矣

贊曰先輩載穉僮打狗一事至胤學修化事者無絕
而筆焉夫慈忍者六度之一也審見胤公之始卒六
皆備焉蓋史傳者以實錄爲本而文章末也今據於
壺囊鈔矣

尾州性海寺沙門良敏傳 證圓

釋良敏字寂忍尾州熱田大官司之子性質和順學
識深廣隨本州淨心濃州照寂學天台宗從觀勝寺
大圓受真言教往東大寺敲圓照室受戒學律弘長

末年居八幡善法寺招戒壇院凝然講四分戒本定
賓略疏又隨照公在洛之鷲嶺聽表無表章大日經
照亦使敏講台教疏籍真言祕典衆服資深鄉之大
塚縣開性海寺及池鈴山兼演宗義唱密教於尾州
以敏爲始也爾後洛東吉水構蝸廬居有弟子七人
禪心光遍觀海定祐證圓良範共尾州人質性英利
學究顯密圓字淨達文永年中稟戒圓照切問律部
範傳在後

醍醐覺洞院沙門實勝傳

釋實勝大相國公經藤公子幼入禪林學書典久侍

覺洞院親快僧正受兩部祕蓋其家傳住覺洞院
唱瑜伽學者敲門正應四年三月十三日得小恙而
寂年五十一

城州釋迦院沙門顯意傳

釋顯意字道教俗姓平氏薩州島津人曆仁二年生
僅及二歲其父出家母攜徙肥前州意幼求真孤標
出羣投原山聖達法師及十一歲剃髮稟戒從侍隆
信于深州縣多歷寒燠通串家教年逾三十住嵯峨
釋迦院移竹林寺未學推門嘗謂徒曰善導疏釋振
舌講者多陳己見翻失真義於是著古今指定記三

十卷略標綱紐屬辭明晰焉弘安九年春於龜山上
皇仙院與顯空法師論淨土三心之義述問答鈔一
卷平居著述有回帖疏疑端淨土宗要各三卷一乘
海義二道血脈圖研覈章五方僂各一卷嘉元二年
染微疾五月十九日寂皆奇雲垂房見者嘆異壽六
十七弟子戒圓良圓共在輦下弘西山義

根來中性院沙門賴瑜傳

釋賴瑜字俊音世姓源氏紀州那賀郡人形貌奇偉
目有重瞳英敏強記幼習世典夜以繼更性苦昏睡
夢一僧教以印咒加持兩眼玄心阿闍梨察其不凡

乞爲弟子前髮納戒授兩部法暨受胎藏界悲生眼
印明始知夢中所受此密印也上高野山隸名傳法
院從事義學慧解秀拔無能及者建長初如南京學
三論華嚴於東大習瑜伽唯識於興福知瑜精於密
教衆請就于戒壇院講釋摩訶衍論康元初寓仁和
寺受廣澤之流義正嘉元年歸高野山著十住心論
艸稿并卽身義顯得鈔夢僧閱鈔日須作文殊疏由
是述祕鍵鈔二卷名開藏鈔蓋祕鍵是顯文殊三摩
地故也文應改元寓木幡觀音院謁侍真空受祕密
口訣承其支灌頂傍質諸宗章疏因由醍醐報恩院

隨憲深僧正受十八契印口訣金胎兩界法記其所
聞述野道鈔指心鈔野金野胎護摩鈔深公覽之賞
著政語又居木旛南院作大乘義首卷及八識義鈔
筆削勞神患健忘疾夢有人示以咒印日每持此則
不忘也如教即瘳常求佛舍利吉祥天像就于醍醐
山房修馱都祕法僅垂周歲忽於壇上感舍利三粒
尋得天像及二脇侍妙刻端嚴殆非人工文永三年
任傳法院學頭職住丈六堂行傳法大會四年冬蓮
華院實深請瑜住中性院厥後瑜所住處皆名中性
八年任傳法院錄十住心論愚艸三十八卷明年筆

記菩提心論愚艸十一年夏往南京真言院傳受祕
鈔彌月功畢弘安二年覺洞院實勝在高野請于中
性道場受傳法灌頂季秋回醍醐中性院嘗有訟事
衆慮之瑜建寂災壇修愛染法至斷決日以元吉
告三年秋從勝公受二重印可雖包衆流以勝之統
立中性流四年辛巳撰阿字祕釋兩卷夢見文殊問
臨滅要太士曰不過所撰阿字祕釋凌空而去少歸
文殊多感靈應凡所住處画像隨身一日文殊現瑜
伽壇擬以散杖太士即隱正應元年遷傳法密嚴二
基於根嶺未及締構寓神宮寺修傳法大會是根來

修會之始也永仁間在根山中性院撰祕鈔問答十
六卷寶鑰論議州正安元年冬十二月於神宮寺肇
行豎義以爲永式嘉元元年集釋論愚州十二卷是
歲仲冬風疾自知不起遺囑後事翌歲二月朔日晏
坐正受結彌陀印湛然而化享年七十有九坐臘若
千歲所著疏鈔一百餘品四百五十餘卷矣天文初
追贈僧正焉
贊曰學密教者言必以賴瑜杲實爲口實焉觀其阿
字祕釋爲文殊所印可則平日所修契本不生與宜
哉密者之稱而不止也耶

高野山大樂院沙門信日傳

釋信日紀州名州郡神宮人父世神官母泉州大鳥
官吏女興正菩薩之外甥也有緣佛種幼慕出家依
櫻池院惠深阿闍梨剃髮受學十九隨大樂院賢雄
阿闍梨學釋摩訶衍論歲二十一就深公受傳法灌
頂去隨西大寺信惠受具足戒習篇聚開遮法歲二
十五住大樂院講大日經疏及釋論義解入真德治
二年二月二十四日泊然而化作金胎曼荼羅鈔四
卷其餘鈔記若干卷爲家學者所寵在焉日亦八傑
之一也

城州醍醐寺沙門嚴家傳

釋嚴家一條關白家經藤公之子從大僧正靜嚴受灌頂法傳諸密軌嘉元元年司東寺長者眾服其智德三年春領寺務并法務尋任大僧正德治元年春修愛染法於仙洞受賞夏四月為護持僧有旨任醍醐寺座主其性多病退居隨心院延慶元年十一月三日逝

紀州高野山沙門信堅傳

釋信堅信日之同母弟也卓軼高恢才識歷眾嘉元初龜山上皇乃宮講釋摩訶衍論昔弘法大師奏以

此論為密教所依堅抑顯揚密義辯婉兇皇心有簡時維冬月寒威逼殿幅裂御袖手賜蒙頭其經篋表題秘密藏背書六大無礙偈奎染以賜寵復敕錄所講之義堅編釋譯論私記二卷備御覽焉述作猶多為密學者所樞要矣堅亦八傑之一也

贊曰龜山上皇在東山離宮常召禪教耆英各說宗要備法喜禪悅之遊焉堅公當是時龍袖分寵著於宗美焉後之教學者襲為章服而榮微之今呼縹帽子者也

和州東南院沙門貞禪傳

義海承信

釋貞禪隨貞敏承三論久遊兩京通大小乘以博達而稱焉住東南院挾俱舍婆娑發智論等以弘宗與覺澄齊時名又釋義海侍東南院重喜大德窮三論受密教善俱舍住持本院以慧解鳴又釋承信與義海同師承於小乘論解折節目居東南院啟敷講席應衆之需矣

贊曰澄禪海信四講師者中古空宗之闡人也非翹精於家教俱舍婆娑瑩玉發智六足擇金故當時稱之四傑矣依博辯之稱而裁記名焉

京兆清水坂沙門良範傳

釋良範號了圓後改興實與州人隨事性海寺良敏推輓顯密兩輪習聲明於周防僧都稟木又於實相上人常持愛染明王感驗異多永仁年中洛東清水坂建愛染堂利益衆人都下奔騶延慶初寂

和州新禪院沙門聖然傳

釋聖然字道明從中道守公人真言院剃染受業就圓照證玄二師稟具學律後嗣智舜雖通三藏獨家三論爲空宗中興矣住新禪院提顯密綱門儕尤多正和元年八月十五日化于本院嘗著戒壇院緣起二十卷矣

城州醍醐寺沙門聖雲傳

釋聖雲龜山帝子隨實勝僧正落節得度生質閑雅
家學深指住覺洞院從中性院賴瑜受具支灌頂補
醍醐寺座主有敕敘親主為太僧正任職稍久能整
寺法正和三竿端午日遷化壽算四十一

和州戒壇院沙門凝然傳

釋凝然號示觀豫州高橋郡人仁治元年春三月生
于藤氏天機聰明如有宿契僅在孩提樂聞佛教人
授句文憶記能誦年至志學投戒壇院入圓照室剃
髮稟業照察其俊秀鄭重誘獎暨歲弱冠得三聚戒

遊證玄淨因之講席擇問律鈔受密灌於聖守稟華
嚴於宗性既而三論法相之玄致細繹研貫蠶匱丹
府又遊京城參佛心宗旁通孔老百氏之道歸侍照
公正元初至文永季凡十有年間照每講經疏使然
覆講碩學通方驩其馮瓶雖括諸宗華嚴命家弘安
初開講大佛殿七寺龍象執卷谷市然振大辯才舌
翻法界道俗喜逢甘露之會照公之後住戒壇院講
經說戒四序無輟正應四年講敷大經於和之金剛
山寺四眾霧集先是招提寺慈真和尚夢善財童子
覆於戒壇院真問此何種也曰雜華之種也真常怪

之至此始知然公是華嚴會中根熟之人也正和二
年移招提寺緇白復集爲禪爾審乘等授別受戒住
職五年回戒壇院然管寺院一十八所寄懷著述卷
帙充棟後宇多上皇巡幸南都登授戒堂就然受菩
薩戒其後召宮講五教章賜國師號元亨元年九月
五日唱滅於戒壇院葬於鷲尾山報齡八十二僧臘
六十三皇情震悼卿庶舉哀然多才宏記華嚴天台
真言三論法相俱舍成實律淨土及國史神書音樂
科條莫不該綜悉有疏鈔探玄記洞幽鈔一百二十
卷華嚴五教賢聖鈔六十卷五教章通略記五十二

卷二種生義三卷梵網香象疏日珠鈔八十卷孔目
章發悟記二十三卷十重唯識帝鑑記七卷律宗華
嚴取真心章二十卷太子法華疏慧光記九十卷太
子勝鬘疏詳玄記八十卷太子維摩疏菴羅記四十
卷四分律本定賓疏贊宗記二十卷律宗瓊鑑章六
十卷南山義章三十卷淨土教海章四十卷淨土音
義記二十卷十住心論義批二十卷十住心論鈔十
七卷佛法傳通章十八卷諸宗傳通錄六十卷三國
佛法傳通緣起三卷餘難具記一代撰述凡有一千
一百餘卷弟子十二人挾律而宗華嚴各化一方矣

贊曰然師在東大日上足禪爾從容問曰見師下筆
書不用藁文不加點鉅篇魁冊不日而成凡有撰述
已來無有如此盛不知勞心思否然曰吾不經意也
猶艸和章何勞之有爾歎曰富哉著述古今罕疇焉
余與戒壇院主面熟情親藏書架裏隨意汎覽亦祿
兵火半秦灰矣今在府庫者纔存十二而又多厄蠹
逸翻覆殘編細觀顛末實間出英才也吁世無博雅
君子不知有高德悲夫

和州戒壇院沙門空月傳性憲

釋空月字禪性初入戒壇稟學圓照受滿分戒通律

關鎖又在于東南院細究三論玄致登高野山承兩
部密灌回戒壇院兼持羯磨慕教外旨問宋諸刹還
說禪教接化二京又釋性憲字本實濃州人從事照
公五篇七聚分其序秩又從圓珠承灌頂法三學研
幾慧解拔萃後入宋國留學辛勤終於支那

醍醐地藏院沙門親玄傳

釋親玄太相國通忠藤公子性地柔和早從親快受
業醍醐文和九年稟灌頂法快與信書囑付相承聖
經祕軌住地藏院持真言教敕任僧正門葉大榮元
亨二年二月十七日化年七十四玄著愚按訣灌頂

記有弟子二人覺雄房玄玄下有親慧慧下有弘願
於是宗脈相續小野三寶院爲東密之正傳云

武州星野山沙門尊海傳宥海

釋尊海字圓頓武州足立郡人納拜信尊剃髮稟戒
神機穎脫解顯密旨初住武之慈光寺處處隨請弘
演妙經郡主崇信仙波東地營構延居海又通籍京
之睿山究研宗教閱七寒暑入心賀僧正室傳七科
法要極三重脈略歸創佛地院丕弘台教緇白歸挹
東關台學海中興之由是東州天台教寺五百八十
屬附波山矣建佛藏院修求聞持法感明星現覺今

波山之明星水明星宮者其影臨之地也昔慈覺大
師駐錫此寺修法得感六百年後海同修感海立三
科義自擬一家法門一曰止觀非法華大意二曰十
行出假菩薩不習圓無作三曰變易名言不且實報
信尊滅後領泉福衆波山泉福往還乘牛口不絕誦
十行出假所依文琵琶橋邊之農夫慣聞誦之仲夏
插秧男女謠曰十行出假菩薩習圓無作邪習兮不
習兮看所依之文邪海以慧心以來十九通之印信
收在泉福爲累代相承之譜矣其七科傳授者一日
一心三觀二曰心境義三曰止觀大旨四曰法華深

義五日圓教三身六日常寂光土義七日蓮華因果
是教重七科一曰一心三觀者同體境智塔中圓戒
二曰心境義成道世間相常住三曰止觀大旨圓頓
法門大意本覺四曰法華深義本地妙法心教相常
住寶塔五日圓教三身六日常寂光土義七日蓮華
因果是行重七科並是塔中法門也弟子宥海博識
顯密嗣住泉福著顯密論談鈔肝心要義鈔心觀明
了鈔等數十卷余昔訪上之談林龍增寺主廣觀法
印一夏交談觀公精教好學因搜索信尊尊海存海
實海十許師之事蹟而歸

贊曰七箇法要者本傳教所唐傳之奧旨也不入其
門而傳之則不易知焉三科義者先輩之未發也波
山之裔傳而家之以俚諺稱笠罽法門良有日哉

紀州高野山沙門良殿傳 印俊 玄雲 實算

釋良殿不委姓所少從賴瑜十五年間不離左右晨
昏孳孳習修密法三十登三摩耶戒壇入兩部曼荼
羅性耐頭陀遊歷暢懷聲名遠播為眾所慕嘉元二
年為傳法院學頭任權律師元弘三年轉少僧都一
日無病結印坐化延元元年九月五日也年七十三
臘五十九又同時有修學院印俊教王院玄雲寶積

院實算親近賴瑜有功密教相次居傳法院學頭職
盛蹟闕之

高野山蓮華院沙門賴豪傳

釋賴豪字行心不詳其氏族出于實尊阿闍梨之門
又就賴瑜究諸教法英辯確論雄鳴擅場元德二年
繼尊公席住蓮華院學者敲門咨問密訣後膺學頭
之選首傳法院之衆不知其所終

高野山迎接院沙門順繼傳

釋順繼字勝圓學于賴瑜有博密名嘉元初年冬瑜
召繼曰吾欲作十題論科註未暇命筆今疾不起矣

續我志者非子不能庶作註疏以惠後世之豎義者
子其念哉繼受顧囑明年九月註成題曰勸劣向勝
不浪門廣短冊時年四十五逮爲傳法院學頭大輔
宗教其所述作法事文章數十篇門流傳存焉

京兆廬山寺沙門照源傳

釋照源字明導源僕射有房子少登睿峰陪諸師席
該貫顯密才優義富住大原來迎院誘姓四衆講台
密乘授圓頓戒勸淨土業後隨檀講移京之金剛院
改額廬山四方來就源有四宗兼學之名天子屢召
宣問台教賜如法衣在猪熊亭講二大部學者筆記

成一百卷名猪熊鈔或曰廬談今行于世矣

濃州實相院沙門賴申傳宗珍

釋賴申字宗佐越前瀧谷寺住侶也十八從濃州實相院宗印受瑜伽法學識俊逸同儕憚之州有宗珍僧都者隨日州日胤習學六年盡其玄秘後回濃州住松山寺講說宗教啟迪學者一時俊傑皆受宗訣申隨九日承顯密法繼補實相說密論導著觀心發源頌焉

京兆悟真寺沙門道光傳

釋道光字了慧隨光明寺良忠稟淨土法為其上首

巡學諸方智辯縱逸嘗入支那謁時名匠歸開悟真弘專念法朝廷敕賜廣濟之號永仁正安間著無量壽經鈔語燈錄各七卷淨土詮註鈔二卷大綱鈔四卷永觀律師十因記二卷共行于世遷化年月日舊記失之

贊曰余見記傳之書古書者虛少實多矣中古以來虛多實少矣至於今時附會牽強偽書贗本梓印紛然語燈七卷皆實錄也乃知光之名不實焉

相州光明寺沙門良曉傳

釋良曉字寂慧相州白旗縣人幼俊發觀苦空及年

十八登比睿山從東塔仙曉剪髮學教二十還鄉師
禮良忠稟圓頓戒習安養修不出門垠給侍九年一
家義旨涵蓄心府弘安二年遵忠顧付繼爲光明之
第二世曉輕己重法慈攝加衆慧辯流暢聽者隨喜
專注攝引二十餘年正和二年總州海上郡船木中
務某建稱名寺請第一代曉居四年還光明寺正慶
元年二月示疾三月朔日入念佛乘恬然氣絕紫雲
掩室歌頌聞空道俗悲哀聲響山谷火浴得舍利數
百粒收於本山築塔其上俗齡八十一法臘六十有
餘矣曉著傳通記見聞十五卷述聞鈔口傳鈔各一

卷決疑鈔見聞論記鈔等數十卷其行于世當時東
關淨土宗義蓋有三流以曉爲白旗義之祖焉

高野山金剛三昧院沙門實融傳

釋實融號證道藤氏之子世爲華族初就泉涌明觀
戒壇圓照稟戒習律隨勝鬘院圓珠傳密軌質律鈔
侍尊勝院宗性周聽華嚴及五教章領會在心慧證
增進嘗在洛東鷲尾山日教授衆會後上野山從安
養院賴賢承傳法灌頂嘉元二年春補金剛三昧院
三學兼備以密應機四遠道俗翔德如市大將軍尊
氏源公聞其風猷崇信供給曆應二年正月十九日

以微志化壽齡九十其所傳密法曰證道流

筑前觀音寺沙門道譽傳

釋道譽字淵月本在白衣泛覽經典乍入緇刹志冀
真乘從泉涌寺智鏡淨因學四分律時人稱為宗家
棟梁入戒壇院就實相照公受具足戒又上睿山親
近碩德稟問教觀之要久居鎮西止觀音寺移往藝
州卓庵習定不記其終矣

和州菩提山沙門唯空傳 圓海

釋唯空字經照初在興福寺學法相棄院遊方學無
常師拜事興正受沙彌戒師稟圓照納比丘戒周旋

洛之善法金山掛搭東福修習禪那上菩提山受密
唯觀祕軌奧義有括囊譽因為灌頂大阿闍梨偉德
法儀甚有威重又釋圓海字道本居東大寺受具圓
照巡遊海龍王戒壇院好學博辯常玩華嚴又就聖
守圓珠二師傳習真言

和州菩提山沙門澄海傳 理然

釋澄海字本心山城州人居長樂寺初司僧官登延
曆寺習學台教入戒壇院受圓照之木又掛搭東福
參請聖一國師晚上菩提山稟承密印據坐主職門
輩茂育又釋理然字如空南京人興福寺圓緣僧都

神足也不留一隅最好下問得法相宗疏通因明學
識優積為衆領袖拜近圓照受滿分戒戒習大小左
祖通受大賢古迹及宗要等善解其結往越之永平
參道元禪師門派粗挹曹洞旨歸旋京華隨空願上
人受真言教丹後建寺大播令名

和州東大寺沙門道玄傳

釋道玄號貞覺示觀國師授滿分戒親炙函丈究賢
首教寓居東大高蹈終世律儀嚴身翰墨自樂作華
嚴五十三略頌新舊會品鈔各一卷性極仁恕行不
騎馬俗呼華嚴老僧又稱貞覺大亨矣

本朝高僧傳卷第十六

音訓

胤	羊晉切	墅	承與切	羸	餘輕切	慳	丘閑切	撓	乃交切
蹂躪	上而由切	塏	於蓋切	煽	尸連切	紐	女九切	晰	列之
也切明	北未切	瘰	丑鳩切	甥	師庚切	縹	匹沼切	韞	匱
上委窘切	下杜谷切	冷市	上克盍切	迪	杜歷切	炙	之夜切		

江府住玉泉軒成九居士信施淨財鏤

木朝高僧傳卷十六 茲冀

上報四恩下資三有家道繁興種智圓明

寶永丁亥佛成道之日 濃州路加納盛德禪寺 知藏比丘 識

本朝高僧傳卷第十七

淨慧二之十四

泉州久米多寺沙門禪爾傳

濃州盛德沙門 師蠻 撰

釋禪爾字圓戒平安城人姓阿部氏陰陽博士精明遠裔也十九捨業就八幡大乘院琳海脫白披緇明年師事凝然國師學二受戒探五教理稟賦爽利義解恢達歲三十三拜圓照席受具足戒住京兆金山院移賀之無量壽福寺為眾常講華嚴及律周禪旋于南都隨真言院聖守稟密入灌頂壇聽法燈國師

之道風提攜，餅錫往于興國，燈預謂徒曰：三日之後，當嘉賓來，及告爾，謁慰，待接，傾誠參尋，遂得玄旨。弘安六年，泉州久米多寺，主顯尊招爾，繼席爾，構禪堂，晝夜二時，率衆靜坐禪，餘開席講雜華及三大律疏，一住四十年，猶如一日，法規肅整，化被遠邇。正中元年，臘月之杪，告諸徒曰：來春正月五，將取滅緣合，時生緣散，故滅四大夢路，往來五蘊空華，開落此尋常事，汝等各自懋哉。苦口叮誡，聞者激越。孟陬五日，示風疾，而禪坐如常。至第八日，晏然而逝，享齡七十有三。坐臘五十有一，門人相集，基於寺後，有神足十

七八盛化，四方矣。

京兆淨華院沙門證賢傳

釋證賢字向阿，本姓源氏，藝州刺史武田時綱之子。官至光祿大夫，入園城寺，剃染出家。寅昏勉強學解，日新及謁禮阿頓，捨舊業，入專念門。阿者良忠之徒，仁和西谷保結，蓮社勤修念佛，賢久隨附，承其法義。洛陽富家崇賢，延招建淨華院，爲第一世。說化方盛，誘蒙惟多，嘗謂修淨業者，異論瓜副門戶，區別法然。所立豈如此耶？宿真如堂，夢聞彌陀釋迦化爲二僧，演說淨土奧義，宿嗟，我清涼寺，重感應，佛勝相於是。

宿疑氷解因錄所見編緝歸命本願鈔西要鈔又撰
往生至要訣記法然以來授受之旨授其徒玄心賢
梵學外善詠和歌載在新選千載集貞和元年六月
二日端心念佛吉祥坐寂年八十二臘若干歲

和州東大寺沙門聖忠傳

聖尋

釋聖忠關白基忠藤公子僅至綺年投東南院從聖
兼大僧正習稟落中登東大寺戒壇受具足戒入賴
瑜室承灌頂法忠風格神秀止儀直方嗜學不倦早
通三藏坐三會講酬解逸發住東南院不調宗乘補
醍醐寺座主任大僧正德治元年冬十月拜東寺一

長者延慶元年三月領東寺法務正應初至正和五
年連賜宣旨三管東大乘法柄者前後十餘年晚辭
職務老于東南矣有弟子聖尋忠之令弟學業通明
盡其深祕正中初補醍醐寺座主任大僧正嘉曆二
年夏補東寺一長者元亨二年住東大寺又爲傳法
院座主
贊曰聖寶稟三論於願曉置東南院於南京爲弘宗
之場其裔相受多兼空密二教而主之今求忠尋師
資之遷歷克踐寶之躅者也

京兆東寺沙門榮海傳

釋榮海大舍人藤俊業子母大江氏有七兄弟大半
出家歸顯密宗爲紺苑英海幼聰敏就父讀書既及
爲人志崇佛乘入醍醐山從慈尊院聖濟僧正稟灌
頂法達諸密部初住慈尊領隨心院移高雄神護寺
敕任僧正貞和元年春正月補東寺長者當時名賓
多遊其門東寺景寶爲承稟之首矣大正及弘長
贊曰海公著真言傳七卷上自傳來八家至諸師士
庶面授之審也身行之練也有靈感者靡不載敘也
余多採之獨憾公之德蹟不存而已

相州稱名寺沙門湛睿傳

釋湛睿字本如不知生緣姓譜少隨凝然從事羯磨
遊雜華海沖融圓理後嗣禪爾爲戒壇院學頭二學
共備一衆服德元應初受檀請住鎌倉稱名寺授戒
講經法席日盛元亨二年著教理鈔建武元年撰纂
釋三十二卷翼解華嚴大疏以某年卒於所住焉

讚州善通寺沙門宥範傳

釋宥範不詳氏讚州櫛染縣人少入郡之新善光寺
前髮受戒學淨土教夢梵僧持聖經數卷令諸人任
意而取範執一軸看之梵字不可明焉問曰是何經
也僧曰密經也汝有緣範乃入州無量壽院隨事覺

道僧正習稟八年胎金兩部小野密派究其源底往
西三谷聽俱舍論永仁二年上高野山值有事故不
得雷厲卽抵下野謁鷄足寺學頭賴尊受三寶院法
流面謁同州衣寺妙祥請聽大日經疏祥曰我昔應
泉涌寺願行上人之招將講此疏於東寺偶值其寂
無意講久奧州如法寺有道性法印是信日之神足
當往求焉性公拒請復還下野行路飢饉往反其窶
祥感至懇始開講進一年畢軸正安元年祥開疏於
武之廣田寺翌歲春又應豆州密嚴院之請講於走
湯山範皆預聽凡從祥公前後九白毘盧印文大率

入手祥公謂曰此疏無鈔學者病諸公爲記之範勸
所聞編二十卷祥公命題名鈔印鈔嘉元三年祥應
平帥之請赴鎌倉府範回觀本師覺道道旨移常福
院命住無量壽院範好靜修閑逸寺側初妙祥曰公
他日還過安祥寺傳慧運流範憶其言延慶二年如
江州安祥謁寺主光譽譽者成慧僧正之高弟名稱
鳴世範往來十八年盡得家祕嘉曆末再治妙印鈔
成八十卷妙祥之徒來受密訣且請東遊範將赴招
善通寺衆曰我寺頽廢非師難興見此散落而他之
哉範不獲已移東北院元弘年中創誕生院曆應三

年護摩堂火餘燄及院一衆騷劇範時修定初不起
座加持灑水猛火便消弟子入堂告曰火滅範跌坐
莞爾尋住善通十餘年間力而興復殿塔厨庫隨序
壯成觀應三年七月朔日奄然唱化壽八十三應安
四年春敕贈僧正弟子宥源州其行狀焉

京兆仁和寺沙門寬性傳 實果

釋寬性伏見帝第三子正安二年立爲親王十三厭
榮入仁和寺從禪助僧正落州納戒清穆好學耐瑜
伽器乾元初年補仁和主務嘉元二年春爲一身阿
闍黎就助公受兩部灌頂夏五月任總法務兼管六

勝寺主應長元年昇敘一品正和元年春上皇弗豫
奉敕修愛染法御惱卽瘳嘉曆元年解仁和印移居
開田貞和二年九月晦日順世壽算五十八矣又釋
實果字金胎從玄海受灌頂學密籍住悉地院聲名
遠馳延文元年領檢校職貞治五年七月二十五日
寂矣

和州戒壇院沙門俊才傳

釋俊才號十達妙年出家慧性卓拔冠年隨師登壇
受具從新禪院聖然受華嚴教真言毘尼兼探冲奧
初住京大通寺一策發興巡遊西州歸董戒壇移真

言院後醍醐帝受菩薩戒賜國師號後住鎌倉稱名
文和二年十月二日謝世壽九十有五臘七十有六
著五教章要文集三十二卷

和州戒壇院沙門盛譽傳

釋盛譽字明智天賦俊逸受業禪爾抱袞凝然精練
三學初住久米多寺遷戒壇院皇張羯磨闡示華嚴
兼授密乘世稱良匠也曆應二年夏五在久米多演
說義鈔講畢夜夢自金峯山衣冠人來曰我金峯明
神之使者也師於澆季演微妙義諸神隨喜使吾報
生口譽寤而有願焉康安二年正月二十一日化於所

住著五教章鈔五卷

和州戒壇院沙門照玄傳

釋照玄字覺行入戒壇院得度本無納具俊才律部
密教討習受持常業華嚴屬意精銳康永四年三月
奉敕幹化東關建東大寺齋堂相之極樂和之戒壇
洛之大通三遷主盟學人盈席講無虛日延文三年
六月五日寂于大通寺行年五十八矣

尾州密藏院沙門慈妙傳

釋慈妙鹿島氏常州神田縣人正應四年四月八日
生歲十七脫世癩登睿山師尊辨明年薙髮受具居

山一紀勤學精進，聲顯密蘊，詣伊勢神期，一千日轉
大般若心乞神授，及其散日，虛空聲曰：美濃尾張利
生相應也。乃屆濃州國主土岐善忠，喜其來化，建寺
延之，泛說宗義三載。往尾條木縣，民前夜俱夢猿猴
持炬數萬羣至，訊之，占夢曰：山王圓頓靈神，而猿使
令也。火炬般若智光也。今從睿山智人來，與其時午
時妙分衛至，開密藏院，請延唱宗妙安藥師佛於殿
壇，遠近人民包賚瞻禮，學徒負笈蓋有三千。應安元
年八月八日，誦觀音咒入三摩地，年七十八臘六十
一，門人如法修荼毗儀，全身鎖骨綴成舍利云。

贊曰：長阿含經曰：前佛悉皆二月八日誕生。八月八
日入涅槃。妙公生滅同其居諸偶，而爾乎抑亦有本
乎，可以爲奇而巳矣。

相州極樂寺沙門正爲傳

釋正爲字圓成，弱齡出家，隨侍俊才，琢磨戒律，游泳
教海，凡七大寺，每有開講，靡不持卷而臨席焉。是故
三藏之奧義，統括納之，靈臺然所覃思者，單雜華也。
延文三年秋，接照玄之跡，住持相之極樂，遷南都戒
壇院，亟講二大律部，華嚴大經，後歸鎌倉，應安元年
八月二十一日寂于極樂寺。

日本書紀卷之十七

江州睿山沙門慈遍傳

釋慈遍京師人吉田下部兼顯子兼好弟也弱登睿
峯剃髮稟戒近事碩匠學天台教又以世業精博神
書後醍醐帝召問佛法神道常在南朝任大僧正遍
著神風和記三卷世人玩之不詳其卒矣

東寺觀智院沙門杲寶傳

釋杲寶不詳其本貫或曰源姓但州人也稗投東寺
稟寧嚴院賴寶法印後往小野面拜榮海傳灌頂法
尋受諸尊印契儀軌又去南都求益性相住觀智院
院有五大虛空藏像寶修求聞持法白米降壇誓曰

不徼世福唯請道果遂得悉地性氣靈敏眼空三藏
胸蟠五車於真言教特極精義故時論曰南山宥快
賴瑜得空海之皮肉東寺杲寶得其骨髓寶不任僧
綱專意著述大日經疏勘註二十七卷釋摩訶衍論
勘註二十四卷二教論鈔十三卷即身義東聞記悉
曇字義鈔各十卷心經祕鍵鈔菩提心論鈔各六卷
祕藏要門玉印鈔各五卷東寶記門心鈔各三卷十
住心論鈔金剛頂經開題鈔理趣經畧鈔等都有二
百餘卷其師賴寶著真言本母集三十四卷
言名目體大東門記弟子元寶撰釋祕要鈔十二卷

或曰真
東寶

日本書紀卷之十七

覺母集七卷寶冊鈔祕要鈔五卷世謂東寺三寶古
稱吐珠主於前振金聲於後者歟二十四家
系曰寶公以博行才述汗牛書實當稱密苑僧寶焉
然觀於歎天台子昉之遺唾而譏評禪宗此即有心
地未鋤荒艸者耶君子於其所不知蓋闕如也且吟
義學之佔畢而比擬格外之玄機者固矣哉高叟之
爲詩也

泉州阿彌陀寺沙門澄圓傳

釋澄圓諱旭宋國人廣覽經論淨教爲宗後醍醐朝
航海而來駐錫京畿勸發四部一時卿庶望風追陪

崇濟北虎關禪師亟詣函丈談雜和宋時獻菜果書
信遞通關師答書稱句有云伏惟白蓮和尚宋地偉
才日域先導開法都城之內馳譽緇素之間旭後遊
化畿內泉州堺縣建立精舍唱淨土教四遠鱗集檀
觀相仍稱旭蓮社一日出寺而遂不還衆人遍尋不
知行處皆應安五年七月十七日也旭無遺弟檀越
故舊以其出日擬爲忌辰嘗撰淨土十勝論十卷松
風論三卷今行于世矣旭平日律身慈仁稱澄圓菩
薩云

和州戒壇院沙門照慧傳

釋照慧字淨心從照玄受具戒遊歷諸寺探問三藏
文和年中遠涉諸夏者宿門頭請益而還盛覺上人
延董久米多寺又隨衆請管戒壇院雖開戒密二壇
以華嚴爲蒂門晚移八幡善法寺邑民趨德或送齋
供應安四年十一月二日取滅於所住矣

和州戒壇院沙門靈波傳

釋靈波號性通足利氏相州鎌倉人隨湛睿于稱名
剃染肄業及入南京得沙彌戒於盛譽稟菩薩戒於
俊才遊行七寺研諸經論主張毘尼光輔雜華和之
戒壇相之稱名移錫匡衆說授隨宜永和三年八月

十五日化于稱名寺壽米疆半章述尤多律興要傳
十卷五教儀解集三十卷五教章鈔八卷五教章性
通記鈔五教斷惑分齊鈔各二卷起信論私鈔十二
卷戒壇系圖通詳記五卷學者寶焉

和州戒壇院沙門總融傳

釋總融字通識別號雪心久侍靈波習瑩律範學涉
諸教尤通華嚴當時學者貴稱先德住和之龍華院
移戒壇院三學均等衆會悅可至德三年四月二十
一日卒

贊曰看融公之譜畧云公釋諸經疏著鈔千卷當時

比於世親大士也不知何經疏其書目題名半紙集
行遂未得之聞見搜索不周至乎實然緇門之巨擘
而大士之稱比亦宜也

根來中性院沙門聖憲傳

釋聖憲字定林泉州人也幼駿逸侍彌勒院實俊法
印歲過弱冠隨中性院增喜學密教喜公孔器重授
以祕蘊出入順繼賴豪二室益臻壹奧兼覈諸流而
至洞徹矣學成德立掌中性務一衆服重推爲學頭
憲晚年慮法場論題事義繁多初學望洋撰定大疏
百條論艸十卷自證說法十八段論艸一卷又釋論

百條論艸口授左右筆成十卷自跋卷尾今密嚴下
用爲手鏡憲之從弟大徹禪師住攝之護國寺唱洞
上之宗憲著阿字觀法一篇以示學侶乃呈徹公徹
雜禪語以加雌黃憲保遐壽扶樹者多矣明德三年
五月晦日晏然而逝行年八十有六法臘若干迄今
攀門葉者每年忌日展講筵薦法味云

睿山神藏寺沙門存海傳

釋存海住睿山東谷神藏寺性情閑雅不慕榮名不
好議論禪觀爲樂入西谷行光房久疑阿字觀祕密
書籍無不染指往慧日山探佛心宗常閱楞嚴經宗

鏡錄海制立口稱念佛某年無病而化嘗述觀心類聚九卷正因果鈔二卷三重鈔三卷自心決夜字大意直顯集各一卷又立真要十一條一日發心條二日四性匹得三日四運心四日三識五日三諦六日五陰七日根境識八日中論四句九日初於聞中入流亾所十日如是漸增聞所聞盡十一日生滅已滅寂滅現前台徒修觀者至今用之

根來妙音院沙門賴譽傳 聖瑜

釋賴譽字定嚴遊學南北密典顯境達奧窺藩長於義論兼閒梵儀著行法要集論義私記若工部學者

傳寫以為格式輿望所屬立為化主譽初妙音院傍有小池時人呼曰小池法印當時同院有聖瑜字玄正密乘足為人之師論衡常歷眾之匹矣

根來妙音院沙門玄性傳 玄譽

釋玄性字空深不知其產不詳師承粹于密說詞辯拔羣住妙音院誘訓學生作論義私記二十卷初學者以為矜式老成人極加優稱同院有玄譽字堯運義學之秀眾請化主矣

根來十輪院沙門道瑜傳

釋道瑜字玄音懷抱利器論辯驚眾雖臘不高眾議

擢爲一百三十人之上首開金剛藏普待方來學侶
欽重呼爲能化衆稱所化能化所化之名於是始也
輔教底績退居十輪院所撰疏鈔數十卷共行於世
上野龍增寺沙門豪尊傳

釋豪尊武州金鑽人永和年中上比睿山就無動寺
心聰法務傳教之重聰者心賀高弟慧心八世之裔
也又從心圓心源二師受行之重於今出川柳御所
再謁心聰淡決證位及歸鄉邑恢播台教道俗靡化
時上州滿願寺有界尊法師興福之人應安三年闢
龍增寺招尊而居爲開山祖重張講幃學徒集歸尊

成談林應永七年十月五日以病滅矣

江州成菩提院沙門貞舜傳

釋貞舜登睿山親附貞濟多歲習學居西塔寶園院
英達之名落落聞時應永年中江州柏原開成菩提
說圓頓法緇素會集頓化寶所常歎台教之衰有志
回瀾因州七帖見聞四教條貫五時法儀諸宗體裁
撮要啟蒙又於慈慧僧正九十餘算作問答鈔名曰
寶要安立應永二十九年正月上旬化年八十九其
後第十世住持真海法師一日窓前看七帖見聞小
蛇蟠几拂之還來怪而視之蛇瞽一月海謂傳聞舜

師發於一日殫精此書意以珍祕以一念差受孔醜
乎我當開濟離其纏報明日開卷蛇復來矣海乃誦
觀法雖正著心同邪文以梅梢打小蛇倏失後不再
來云

高野山寶性院沙門宥快傳

釋宥快京城人羽林次將藤實光子總角黠慧歆羨
桑門陟金剛峯師寶性院信弘阿闍梨入壇灌頂素
好博古涉獵該貫應安七年住寶性院密藏洞達羣
侶赴集龍樹之論無畏之疏弘法義章探賸索隱剖
析文理糾紛開通義路室塞裴然成章五百餘條

學之興於是爲盛矣復欲慧運流之密水挹彼
永和三年適安祥寺謁興雅僧正握衣升堂雅公者
藤實博之子隆雅僧正之嗣遠承運師二十三世密
印相續脈絡在掌喜快氣宇竭底授與故安祥正流
歸入寶性歷今二百餘歲綿綿不絕也至德年中禁
中修法後圓融上皇賜御製和歌快卽應製奉和作
悉曇鈔有疑未決一夕神女冠珮珊珊持燈來告曰
我此山神丹生津姬也感師之精勤故來矣快舉悉
曇之決疑處神乃一一指授快復問曰旣稱明神何
用燈耶曰實無昏暗以師挑法燈而示其標相耳因

詠和歌忽失所在晚老于善集院應永二十三年七月十七日手結契印口誦神咒如入定而逝享年七十有二坐夏若干所撰疏鈔凡數百卷有六日經鈔三十一卷宗義鈔二十二卷釋論決擇二十卷悉曇決擇鈔五卷悉曇字記鈔悉曇考覈鈔各六卷十住心論義林二卷心經祕鍵信力鈔二卷等一家學者用為龜鏡焉神足成雄記云快師唐一行禪師之再來也贊曰安祥寺之法流三百四十餘年間繩繩相承二十五世光意僧正之後不聞統屬矣蓋以逢時之亂

而人法俱泯歟快公若不承稟之千鈞祕法不為世寶焉繇是觀之其金剛薩埵之遙孫也耶神女決悉曇之疑詠法燈之歌者我常疑楚人之賦焉

高野山無量壽院沙門長覺傳

釋長覺羽州人青年出鄉詣頡野山面承真祕將寒冰焉資稟厚重義辯如流嘗聞城州鎌倉俊譽阿闍梨極西院流振錫登門傳其真印應永初年住無量壽院暨金剛幢管轄密門法席填委導利羣物二十三年丙申十一月十五日化緣既盡奄然終矣報齡七十有一僧臘若干歲平生撰述卷帙甚多覺與宥

快年相若道相似齊雄名焉

武州無量山傳通院沙門聖罔傳

釋聖罔字了譽本貫常州父志摩守源某佐竹義光之裔也母患無嗣禱嚴瀨神感靈夢而生頂骨高峙眼稜電寒五歲父戰外罔求出離九歲依瓜連常福寺了實難髮染衣氣如囊錐日記數百言間舉誓疑蔚有老量及年志學付大田蓮勝見其俊利曰大象何可留免徑指赴鎌倉定慧之所先夜慧夢文殊大士乘白象持赤軸來稽侍未久悉得奧義年二十一述口決鈔二卷慧見而大稱二十五入大澤輪藏

一代教遍學諸方傳密祐存習顯真源問禪月菴天明二師往野之鹽田寺宋聽俱舍唯識永和四年住下野往生寺始演淨教又受千葉貞胤之招移相馬曾根鄉說專念法嘉慶二年續實師席淨侶輻湊暫避州亂隱不輕山復歸常福一日白龜負八角鏡出自崑瀨獻罔之室因圖其形常安九上上足聖聰及開武江之增上寺邀罔養焉應永二十二年相攸於小石川結茅專修檀躡如廩遂成梵刹號傳通院罔居六年老病時至澡浴新衣書辭偈曰放行把住滿八十年即今端的識不識日輝東嶽月西天擲筆合

日本書紀 本朝高僧傳卷第十七
掌念佛唱化應永二十七年九月二十七日也世壽
如偈臘六十五壙封全身於寺裏焉阿宗學外神籍
和歌測微屬思著述特多採鈔四十八卷直牒十卷
二藏名目三卷二藏頌一卷二藏頌義三十卷二藏
見聞三卷顯正記淨土傳戒論心具往生記涇渭分
流集各一卷神道麗氣記鈔和歌註解等行于代矣
贊曰以阿公之書比淨家先作可謂藍冰之克家也
白龜負而出者有似圖書之祥矣吾佛弟子之中感
於四靈之瑞者往往有之蓋皆以誠心而守法王之
制也雖澆漓而不能無驗夫可不懋乎哉

紀州高野山沙門長譽傳

釋長譽能州人神志高尚義論無儔應永十四年以
丹生神之託啟論席於山王院宥快為證義者譽為
賢者兩雄往覆言鋒相交更深坐久眾聽忘倦常居
無量壽院誘掖學徒同三十年七月十四日卒

本朝高僧傳卷第十七

日本書紀 本朝高僧傳卷第十七

日本在... 本朝高僧傳卷之十七

音訓

爽 疏兩切 禩 詳子切 隙 將候切 蹟 資昔切 譜 博古切

莞 胡管切 穆 莫卜切 佔 尺占切 壺 苦本切 間 何報切

歆 虛今切 獵 力涉切 罔 居永切 稜 盧登切 藍 虛談切

澆漓 上堅姚切 下鄰溪切

江府住玉泉軒成九居士信施淨財

本朝高僧傳卷十七 茲冀

上報四恩下資三有家道繁興種智圓明

寶永丁亥佛成道之日

濃州路加納盛德禪寺 知藏比丘 識

本朝高僧傳卷第十八

濃州盛德沙門 師蠻 撰

淨慧二之十五

武州增上寺沙門聖聰傳

釋聖聰字曾譽下總人千葉氏貞胤之第四子貞治五年誕自孩提時不茹葷血天生黠慧小學出隊投常福寺聖罔室十五剪戒通習三典不捨晝夜罔授圓頓戒付自撰二藏義略頌聰從此太行化四方應永季於武州貝塚營增上寺勸弘淨業學侶圍座談法不倦般舟三昧老益精進一日遘病念佛坐寂永

本朝高僧傳卷之十八

享十二年七月十八日也春秋七十五夏臘六十一
火浴遺骸塔於本山述作無量壽經要註記二十四
卷論註記見聞十卷大原見聞萬德集全明集論藏
集徹隨鈔當麻曼陀羅鈔等各一卷
贊曰宿殖德本果必待時而成也增上插艸之日叢
爾一方暨東照源君撤舊一新涌殿飛樓金碧煥輝
江海房寮編町衆恆萬指舉以爲關東十八談林之
首不因管時裁八福田安得今日仰三菩提之如斯
也邪

高野山寶性院沙門成雄傳

釋成雄甲州人冠歲好學尋問東關應永年中觀遊
洛城貫究顯密傍通性相後登野山謁審性院宥快
先一夜快夢熊野神告曰明日爲人師國審者當入
密室翌日雄至神機挺特如石投水師資道合遂傳
兩部大法補審性席主伴討論常無虛日審德二年
五月八日化於住院壽七十一

江州淨嚴院沙門隆堯傳

釋隆堯江州人僅九歲早英邁陟睿山學台教千如
十界諦見幽旨俄思念佛捷徑法門欣修淨土應永
癸未詣石山寺祈求冥助觀音現身示教利喜本郡

淡谷卓菴專修一行三昧道俗崇信淨嚴院成寶德元年十二月十二日奄爾而逝年八十一臘六十餘著念佛安心大要遺於門侶云

紀州高野山沙門宥信傳 快全

釋宥信常州產少出東鄙入寶性院師事宥快侍密壇久神氣高峻睿相發眉一日隨快入宮後圓融帝直任僧都灌頂已後遊諸師門縱探密蹟顯綱既握快師印契住如意輪寺衆歸如林亨德三年司高野檢校職不考其終又同門有釋快全頗有才力稟宥快之祕印住釋迦文院唱瑜伽法多作疏章啓過後

學云

和州東大寺沙門志玉傳

釋志玉字總圓別號渡西或稱談宗利帝利種姓也僅垂髻年師戒壇院總融律師落飾受業從同寺融存太德承三聚淨戒學三大律疏兼聽華嚴貫達精微究大小乘未至壯歲解歷南北遂以應永二十四年截溟入明即永樂十五年也列利宗匠推以廣學太宗召宮講華嚴經賜普一國師之號在明五年經疏什具滿船載歸住東大寺遮那大殿講華嚴經圓辯驚衆稱光帝重賜國師之號二嚴兼備化儀甚盛

相之極樂寺稱名寺阿彌陀寺賀之大華嚴寺洛西
高山寺玉皆滌纂讚州屋島寺屢夏歲霜廢久玉不
忍見勸化西州營復再成乃付上足普開律師玉下
日奔檀越恣歸過春日神祠俄電雷掣空疾風折木
守祠巫祝皆畏縮太皆神出殿謂玉曰我忘死穢上
人既有觸事何過祠前耶玉曰始知衆生本來成佛
生處涅槃猶如昨夢神其不思之乎神喜微言詠和
歌卽隱寬正四年九月示寂於北京梅尾山春秋八
十一東大凝然之後興大經者玉之力居多京師相
國寺瑞溪鳳公寶幢寺大梁梓公從玉問教玉亦就

鳳聽禪要云

贊日南遊諸師唐宋元明賜紫拜號教禪俱有玉公
亦崇才德昇金殿講獅子吼經不膺太寵揚國之華
歸朝奉敕講大疏於舍那寶殿重拜師號吁使迦文
最初之太法再蒙澆季緇白化道之煽幾乎光前絕
後也矣

京兆誓願寺沙門真阿傳

釋真阿平安城人後醍醐天皇之孫明辨內外觀世
相變年三十六入誓願寺剃髮出家未安法諱其夜
殿裏尊像告曰汝當名真阿彌陀佛夢寤不勝感喜

日本書紀 本朝高僧傳卷之十八
益樂念西方業大將軍義教源公入寺問訊禮敬甚
至有刑罪人欲憑阿免阿往台府訴之不許一揖而
出源公起送見阿頂上圓光髮髯源公下庭惹衣合
掌欽受稱號因宥罪人特下寺側建十念寺請阿安
居二十餘年不出寺門淨業無虧臨終浴軀剃髮端
坐合爪唱彌陀寂香薰且滿奇華墜庭壽六十六永
享十二年七月二日也遺命門人水葬於下鳥羽淵
飼諸鱗介都城僧俗奔波讚禮公府下制其淵禁漁
于今尚在云

紀州高野山沙門快尊傳

釋快尊泉州人十一入宥快室侍應對十六得度洗
指三密英敏秀發早稟灌頂持錫遊化隨處張講應
承末良雄讓寶性院與尊住持在管野山有問答講
星移物換論席久廢尊常有回倒瀾矣一管定坐
異人來曰我兩所明神之使者也神感師之志使我
傳言欲遂所願兩所神祠當設兒童之論議言訖飛
空去二月既望於天野宮始啓論席暨者西方院華
壽題者五智院朝算問答酬酢稚辯泉湧衆會拍手
稱未曾有仁和寺法務傳聞喟嘆曰了童張場振古
希豈有神之感助乎奏納紀州名手莊租稅五果充

問答講之供每歲四季恆行法會文正元年七月二十三日化春秋七十六

系曰畜了童飭萃靡吾佛制之神借尊之手使其習論場者護法之心在于茲我之言非乎是也與

睿麓西教寺沙門眞盛傳

釋眞盛紀氏之子貫之遠裔其母歸命地藏菩薩誓絕葷膾夢吞寶珠寤卽身盛嘉吉三年生于勢陽壹志郡容貌端嚴稟性朗拔七歲入郡之光明寺從盛源律師讀內外書典十四剃戒十六遊學居尾州密藏院學眞言教太登睿山依西塔慧秀和尚二十四

年不下山頂傳承兩部密灌三觀法門文明九年爲大乘會講師任權大僧都十四年秋退居黑谷青龍寺課彌陀號日六萬遍周看藏經夢傳教大師摩頂授往生要集日欲度衆生無如此軸盛遂於坂本源生寺講說要集橫川衆僧招以西教寺曰此寺慈悲源信肇基繼緒暹賀源空修淨業說圓戒實先德修法之地爾來爲墟請聞法音盛乃入寺說戒念佛無有虛日四衆作市檀施輻湊堂閣僧房四十餘所未至數稔鬱全備焉長享二年洛之誓願寺主招盛一七日中說專念法大將軍義政源公入寺就盛受誓

日本書紀 本朝高僧傳卷之十八
薩戒一家將種共受五戒十念源公親贈佛具木蘭
色袈裟銅錢二百緡盛受不畱寄入洛東元應寺是
秋往信之善光寺還而畱越前府一七日說淨教府
內大廳建引接寺延德元年弘化勢州安野郡民構
西來寺延請一夜神女告寺衆曰聽盛師教脫無始
苦欲報此恩妾無所任此太雲津川矢野淵有大良
木已歷千年人無知之取用塔材妾爲護神持奉銅
錢百緡隱太翌朝募人以索組腰探淵獲木徑七尺
餘二十五尋大殿講堂揮斧丁丁其百緡錢日用不
盡精藍功竣皆化小蛇寺鄰沿海井鹹不食神女告

曰勿憂當變明晨挹之冽爲甘泉二年八月越前府
主朝倉貞景招盛於安養寺受五戒十念弛關放囚
其家臣上田氏造西光寺延盛供養異華雨地三光
耀天又歸西教寺修不斷念佛明應元年帝名盛於
清涼殿稟圓頓無作大戒尋上念佛旨要宸書傳戒
國師眞盛上人八大字以賜之河州刺史畠山義就
招盛聽法義就荒禽盛爲說罪卽放犬鷹勅西蓮寺
迎爲第一世二年甲寅勢州小田莊成願寺檀請繼
至四年正月在賀州西蓮寺四十八夜念佛說法二十
月晦日俄病法筵雲集力疾登座演宣眞要詞辯特

鮮既歸寢室集門人曰我至黃昏必當取滅末後囑示一言蔽之寡欲清淨當勤念佛漸及期至同音念佛聲氣噎盡口搖唇吻顏含微笑安詳而寂香氣薰岐瑞光照夜享年五十有三坐夏三十有九荷奉全身七日結緣黑白弟子五百餘人揚聲泣曰慈顏何日又得拜瞻存日行時牛馬屈膝弭耳伏地受盛十念或別時念佛神龍點靈燈一時日吉明神現來曰上人所度之衆生皆生極樂在世化益當五十三神言有驗矣

贊曰天元之間源信僧都在西教寺持西方券過年

半千盛公則之傾王者冕受將軍贊明神垂感異類歸法古稱當五百年命世者出是其定數與

相州光明寺沙門祐崇傳

釋祐崇字觀譽巡歷東關習學精勤住相之光明寺講經多衆明應四年唱導都下遂入禁宮講彌陀經奏說協旨敕令諷慈覺大師傳來聲明乃率具如堂之衆僧就于內殿誦唱彌陀經及念佛賜香衣上人號崇奏以殿修式永世移行于光明寺重賜紫袍於光明寺方今專念之寺初冬唱十夜念佛者自崇而始一日微疾有瑞雲下知死期至威儀端坐高聲念

佛遠曰西方佛來言未終化肯永正六年十一月八日也未詳春秋夏臘著二藏義見聞十卷

紀州高野山沙門仵遍傳

釋仵遍少巡諸方慕真言啟年二十四齊高野山拜寶性院良雄阿闍黎服承訓弊得兩部灌頂法質問者臘義學名著文明九年住寶性院講布顯密宿學憚之永正十二年五月十一日順世年六十二矣

紀州高野山沙門印融傳

釋印融武州久保縣人生氣含英特具志節羣籍經目自然憶持鄉邑無足為師者弱冠杖策遍學南北

駐高野山淬練業成主無量光院品藻宗教筆削著

志嘗憂關左密法之衰晚年東行居武州鳥山三會

寺性好讀書或赴外請必駕小牛鞍著文卓行誦且

吟東關緇白崇德歸風永正十六年八月中旬夜半

取滅壽八十五關東八州有古義談林六十餘院寫

融小肖歲時饗祭平生撰述有杣保隱遁鈔二十卷

釋論指南鈔十卷大日經指南鈔九卷釋論愚案鈔

七卷古筆拾遺鈔十住心論廣名目各六卷大日經

愚案鈔金胎曼荼羅鈔各三卷大日經奧之疏詮要

鈔諸真言句義釋論名目各二卷等凡數十百卷學

日本書紀 本朝高僧傳卷之八

者為珍行于世

武州喜多院沙門實海傳

釋實海武州川崎人或曰品川自幼俊利思出羣童早入

教寺剃髮肄業嘗在檀越大田道灌宅呼僕夫曰將

盥水之水來俗語泚類謂為手水道灌在傍曰盥水而足矣將

非刺語乎海曰若唯盥水或持湯來道灌動容淡服

敏捷長涉論場負魁博名住星野山喜多院關左台

徒負笈逼塞化眾之暇著述夷希集徹塵各十卷鹽

味集二卷教觀大綱見聞鈔三卷天文二年示寂壽

八十八在星野山時有莫禮者兇惡無比次日請海

送終化人來曰彼罪彌天必莫法救海謂釋氏之道

善惡齊利豈忍拒之乃整威儀出於郊外俄怒雷轟

天電掣迸空海舉扇曰我代受苦須臾雷止雲收而

克葬海寂二年寺後杉上有聲曰我代莫禮入地獄

受苦今已免之即不見矣

贊曰一切如來大慈悲觀音一人代受苦海之言迹

與經符合矣夫內祕菩薩之人也與

勢州真常院沙門亮典傳

釋亮典字文性俗譜倉垣內氏勢州宇治縣人母夢

異僧振錫來而妊慶長丁未四月幾墮生自幼聰慧

日本書紀 本朝高僧傳卷之八

〇十

有出家之志十二入郡之建國寺剃髮通誦法華十
三隨憲式學真言教又投化主空鏡義解通利久留
山融餒乞爲弟子改以今名乃授沙彌十戒尋受四
度瑜伽十七太登金剛峰寺軒昂論席蚤發宣名掛
錫洛之智積謁日譽元壽二僧正聞根嶺之祕奧學
餘傭書取辨衣食歸就鉸師稟兩部灌頂任阿闍黎
位爲衆開筵講大日經疏孳孳于學業獨尚質素包
笠芒屨遊遍四方尋禪人問禪要逢教者探教義卷
衣還鄉隱于宮崎據樹構寓傍崖石架拾薪採泉專
注送歲弊衣疏食生涯以足又卜崑井田神路山下

營眞常院日率同伴腰鎌肩鑿誅荆棘平堆阜容衆
雖狹講說無闕謂其徒曰吾見瑜伽中月輪宛然皎
徹圓明拂之不障又謂賴音曰靜心安住久久純熟
三摩地成于其勿避聖言不浪密乘院宥雄乏承屬
資使人諭招典卽往攝之蓮華院傳雄衣信地藏流
之密璽妙訣盡得面付到處應需法華梵網揮塵便
便所述亦多承應壬辰謁心蓮院宥崑僧正引入漫
荼羅場授與廣澤祕流寓密乘院會病不起八月十
二日右脇而寂歲四十六臘二十六葬于法金剛院
仁和寺法親王追贈上人號智積院僧正運敞撰行

業記及銘墓上焉。贊曰承應初元文性上人在仁和密乘院寄講起信論疏辯之建旃能折結角與余語及妙心門派負包徧參曰沙門行履皆當如斯季世言行相應亦罕也展若之人鑊乎鐘鼎不爲虛美焉。論曰太覺世尊利見竺莖四十餘年天上人間所說半滿根文其數八億象馱負而無窮龍舟載而有剩寔非二西五車之可比而幽妙深遙淺知暴腮於是諸大論師間出製作微言亦有魁卷鉅泰充棟汗牛東漸之後震丹諸師乘運逢時研瑩註釋推明經綱

論紀遂立宗義流覃日域而今獨盛世著潤美凡八宗備矣蓋法本一理分爲萬品所謂日月星辰山河艸木在其中間則人倫禮義之文章與羽毛鱗介之異類是其大者也。至森羅羣像之細瑣者千筮萬別巧曆不能籌之非夫辯慧何以明哉以人心本具之靈慧窮衆物所具之事體慧之時義大矣哉本朝齊明之代吳國福亮始維摩會神睿道慈繼慧解名鏡忍嚴智登覆講選慈訓摘雜華任法相善珠妙年摘藻述記勝虞善議唯識三論之法將常樓常騰宗鈔多矣安澄泰演衡持空有勤操尊三論以君父中繼

講最勝王經義真護命奏書護宗三論文睿著大義
鈔因明修圓濟思記鈔平備信行有宗達者以記述
鳴施平明福博行長論德一疏破傳教道詮崇真釋
論慈覺智證前後入唐有顯密作良源法藏仲筭壽
肇官論名高人皆知之義昭真喜手到湛昭秀安應
和角論之徒源信覺運難弟難兄分慧心檀那兩流
安海中立不屑兩門安然在顯研密玄照善瑜伽通
因明真興貞慶相宗翹英自儉葆光源空攘臂專修
有撰擇集高辨中興華嚴多著疏鈔修禪密感神敬
承久之間南京有秀慧顯範覺雄尊玄四學近究俱

舍成實通三論華嚴特人比四天王聖禪宗性遊
匠門研一經一論道範賴瑜宥快印融真言英達多
著家書賴寶杲寶元寶亦博宗撰書是謂三寶智舜
說空延當世賓疑然著書千卷獨步古今良忠學窺
諸家筆削淨教聖罔聖聰撰述甲於其家靈波入雜
萃海觀瀾章富志玉講華嚴犯龍顏支那本朝共署
國師亮典殿出三學均唱三密濟濟多師揭慧光照
搏桑矣或問三學六度慧在於後此篇何第一耶通
日以菩薩急於化佗有檀戒忍等之序由聲聞求於
自度有戒定慧之序若以修學而序之必當慧在第一

一菩提資糧論云般若波羅密是覺初資糧也古人云法門次第戒定慧觀門次第定慧戒學門次第慧戒定又六度總舉三學別說其本一而隨時可序故支那三傳本朝釋書皆以慧置第二也此書前後十科倣於古法不可以一例而誥焉



本朝高僧傳卷第十八

音訓

會 慈秋切 黠 胡八切 惹 爾者切 了 於加切 臙 尸連切
縉 彌鄰切 囚 慈秋切 吻 武粉切 晁 莫典切

江府住玉泉軒成九居士信施淨財鏤
本朝高僧傳卷十八 茲冀
上報四恩下資三有家道繁興種智圓明
寶永丁亥佛成道之日
濃州路加納盛德禪寺 知藏比丘 識

日本書紀 高僧傳卷之六 止

皇朝通志卷之六

皇朝通志卷之六

皇朝通志卷之六

皇朝通志卷之六

皇朝通志卷之六

皇朝通志卷之六



皇朝通志卷之六

皇朝通志卷之六

皇朝通志卷之六

				和書門
			二九四七八號	類
		一〇函		
三二册	七架			

庫文閣内			
九	九		和書
函	三	四	
二	二	七	
架	册	八	類
		號	